

ఎపెసియుల్ క రెగిడ్లి ఉత్త్రుమ్ బారిక్ జలో పవులు ఎపెసు పట్టుమ్చ సంగుమ్చక రెగిడ్లి ఉత్త్రుమ్.

మొదొల్ కోడు

¹ దేముడుచి సెలవ్చి రిసా క్రిస్తు రచ్చించుప కెర్తొసా జలో యేసుచి సుబుమ్ కబుర్ కామ్ కెర్తి రిసా, జో దిలి అదికారుమ్ తెన్ జోక బారికి జలో ఆవ్ పవులు, *ఎపెసు పట్టుమ్తెచ †క్రిస్తు జలో యేసుక నంపజా, నుద్ది జా జోచయ్ మాన్సుల్ జా, జోచి తెడి తా నిదానుమ్ జలనక, రెగిడ్లి ఉత్త్రుమ్.

అగ్గె తెంతొ దేముడు ఉచర్లి రచ్చన

² అమ్క అబ్బొ జలో దేముడుచి ప్రబు జలో యేసుక్రిస్తుచి దయ, సేంతుమ్, తుమ్చి ఉప్పిరి తవున్!

³ అమ్చొ ప్రబు జలో యేసుక్రిస్తుక దేముడు జలో అబ్బొన్ జలో దేముడుక జెయ్యి! క్రిస్తుచి అత్తి జో అమ్క దయ కెర, ‡జోచి రాజిమ్తె అమ్క బెదవ, ఆత్మవరల్ ఎత్తి అమ్క జో దా అస్సి. ⁴ దస్సి, అమ్క, 'క్రిస్తుచి తెడి జోచి పరలోకుమ్చి నుద్ది జా అంచి మొక్కె పున్నిమ్ జతు' మెన, లోకుమ్ నే జెర్మితె అగ్గె తెంతొ జో అమ్క నిసాన్లన్.

⁵ అగ్గె తెంతొ, జోచి ప్రేమక ఉచర, జోచి సొంత ఇస్తుమ్క, 'అంచొ పుత్తు జలో యేసుక్రిస్తుచి తెడి జేవ్ కి అంచ పుత్తర్లు జవుల' మెన, అమ్క వరుమ్ దిలన్. ⁶ పూర్తి ప్రేమ జలో పుత్తున్చి అత్తి గవురుమ్

* **1:1** 1:1 బయబిల్ తొలితొ రెగిడ్లి సంగుమ్ పుస్తకల్తె ఈంజ కోడుతె ఎపెసు పట్టుమ్తెచి కోడు తయె నాయ్. † **1:1** 1:1 'క్రిస్తు' మెలె 'తెర్తయిందె' మెన పూర్గుమ్ ఎత్తి అదికారుమ్ తిలొ దేముడు యూదుల్క సంగిలో దొర్కు జలో రచ్చించుప కెర్తొసా. ‡ **1:3** 1:3 పరలోకుమ్తె అమ్క బెదితి కోడు, ఈంజ.

జలి జోచి ఎదివాట్ కీదయ అమ్చి ఉప్పిరి జో తిలన్; జోచి నావ్ గవురుమ్ జవున్!

7 జో యేసుయి సిలువతె జోచి లోయి గేడవ అమ్చి పాపుమ్ పుంచ, అమ్ కెర్ల పాపల్ చెమించుప కెర, అమ్క *నెతోవ గెల అస్సె; 8 జోచి ఎదివాట్ దయ అమ్చి ఉప్పిరి దేముడు అబ్బొసి తిలి రిసా అమ్క †నెతోవ గెల అస్సె. 9 ఎత్కి అర్దుమ్ చినుత్ బుద్ది తెన్ జో దేముడు అబ్బొసి అగ్గె తెంతో ఉచర్లిసి మదెనె గుట్టు తిలి రితి జా తిలె కి, అమ్ సూనీతి రితి, జో అప్పె బార్ కెర అస్సె. 10 మెలె, క్రీస్తు జలో రచ్చించుప కెర్తొసాక తెద్రవుక మెన, దేముడు ఉచర్ల దీనల్ బెర్తి కాలుమ్క జెయిమ్ కెరిందె మెన జో అగ్గె తెంతో ఉచర్లిసి. కిచ్చొక క్రీస్తు జలో రచ్చించుప కెర్తొసాక జో తెద్రవుక తిలి మెలె, పరలోకుమ్తె తిలిసి ఎత్కి కి, బూలోకుమ్తె తిలిసి ఎత్కి కి ఎత్కి కి జో క్రీస్తుచి తెడి ఎక్కి కట్టు జతి రితి బెదవుక.

11 జోచి సొంత ఇస్తుమ్క ఎత్కి జర్గు కెర్తొ దేముడు 'చెంగిల్' మెన కిచ్చొ ఉచర్లయ్ గే, జా ఎత్కి కచితుమ్ జర్గు జయెదె. 'జర్గు జవున్' మెన అమ్చి రిసా జో ఉచర్లిసి కి జో క్రీస్తుచి అత్తి జర్గు జలి. 12 కిచ్చొ మెలె, జో దేముడుచి గవురుమ్ ఈంజ లోకుమ్తె డీస్తి రితి అమ్ ఇండుక మెన, క్రీస్తుక నంపజా జోవయించి తెడి దయిరిమ్ జలనక అగ్గెయి తెంతో జోవయించి సెలవ్, అగ్గెయి తెంతో జా వరుమ్ దా అమ్క జొయ్యి నిసాన అస్సె.

13 సత్తిమ్ తిలి ‡కోడు, మెలె తుమ్ యూదుల్ నెంజిలన కి రచ్చించుప జతి వరుమ్ దొర్కు జతి సుబుమ్ కబుర్ తూమ్ కి నూన నంపజా అయ్లి రిసా, 'జా వరుమ్ దిలి రుజ్జుక అంచ మాన్సుల్చి పెట్టి అంచి ఆత్మ దెయిందె' మెన దేముడు ప్రమానుమ్ కెర తిలి జోచి సుద్ది తిలి ఆత్మ తుమ్చి పెట్టి కి దా తుమ్క 'అంచయ్' మెన జోచి

§ 1:6 1:6 అమ్క ఎధరె పున్నిమ్ నెంజిలె కి జోచి ఎదివాట్ దయ, ఆరి, అమ్క దిలన్;

* 1:7 1:7 నెంజిలె 'విడ్డల్ కెర అస్సె', నెంజిలె 'రచ్చించుప కెర అస్సె'. † 1:8 1:8 నెంజిలె 'విడ్డల్ కెర అస్సె', నెంజిలె 'రచ్చించుప కెర అస్సె'. ‡ 1:13 1:13 నెంజిలె 'కబుర్'.

ముద్ర దా అస్సె. 14 అమ్ నంపజలనక కీనెతోప గెల అస్సి, చి పరలోకుమ్తె బెదితి వాట తుమ్క కచితుమ్ దొర్కు కెర అస్సి మెనయ్ జో ప్రమానుమ్ కెర్లిసి పూర్తి జర్గు జతె ఎదక ఈంజ బజాన్ జయెదె. ఈంజ ఎత్తిచి రిసా జోచి గవురుమ్ డీసెదె.

పవులు ప్రార్థన కెర్లిసి

15 ఈంజ తుమ్క జోచి నుద్ది తిలి ఆత్మ దిలి వరుమ్చి రిసా, ప్రబు జలో యేసుచి ఉప్పిరి తుమ్ నముకుమ్ తిలి రిసా, పడ్డో జోచయ్ జల మాన్సుల్ ఎత్తిజిన్క తుమ్ ప్రేమ కెర్లిన్చి రిసా అమ్ సూల్లి రిసా, 16 ఆవ్ ప్రార్థన కెర్తె పొది తుమ్చి రిసా అమ్చో దేముడుక అంచి సర్ద సంగుక ములి నాయ్. 17 తుమ్చి రిసా ఆవ్ కిచ్చో ఆస జా ప్రార్థన కెర్లిసి మెలె, అమ్చో ప్రబు జలో యేసుక్రీస్తుక దేముడు జలో, పరలోకుమ్చి ఉజిడ్ జలో అబ్బొన్ జలో, గవురుమ్ తిలొ దేముడు, తుమ్చి పెట్టి జోచి ఆత్మ తా కామ్ కెర కెర, జోక తుమ్ పూర్తి జాన్తి రితి తుమ్క బుద్ది గ్యానుమ్ దెవును, దొర్కు జలిసి దెకవును. 18 తుమ్చ ఆత్మ అంకివో దస్సి చెంగిల్ దెకిత్ రితి జలె, తుమ్ *కిచ్చో దయిరిమ్ జతి రితి జో తుమ్క నిసాన, దేముడుక నంపజలన తెన్ 'తుమ్క దెయిందె' మెన జో ప్రమానుమ్ కెర్లి పరలోకుమ్చి ఎదివాట్ సొమ్మారుమ్ వాట కీసిచి గే, కెద్ది విలువచి గే, 19 పడ్డో, అమ్ నంపజలనచి పెట్టి జోచి కామ్ కెర్తి ఆత్మనెక్తి కెద్ది నెక్తి గే, జా ఎత్తి తుమ్ సికితె, జయ్యి అంచి ఆస.

యేసుక దేముడు అబ్బొసి అదికారుమ్ దిలిన్

20 క్రీస్తుతెయ్ జోచి జా ఎదివాట్ నెక్తి తిలిసి ముక్కిమ్క కత్తె నెరవెర్చుప కెర్లన్. జోచి నెక్తిచి రిసాచి జా కామ్ ఎత్తి కీసి ముక్కిమ్క జెయిమ్ కెర్లన్ మెలె, క్రీస్తుక అన్నె జియడ ఉట్టవ, పరలోకుమ్తె కడ నా, ఒత్త జోచి సొంత ఉజిల్ పక్కయ్ గవురుమ్ తెన్ వెనవాన

§ 1:14 1:14 7 నంబర్చి ఎజ్జాచి కోడు దెక. * 1:18 1:18 రోమియులు 8:18-25, కొల్స్సియుల్ 1:5 దెక.

అస్సె. 21 ఒత్త జోక అబ్బొసి కెద్ది గవురుమ్ దిలన్ మెలె, †కిచ్చొ అదికారుమ్ తిలిసి ఎత్కిచి ఉప్పిరి, ఎత్కి‡అదికారుల్చి ఉప్పిరి, †సెక్కివొచి ఉప్పిరి, *ఎలుప కెర్తి ఎత్కి సెక్కి అదికారుమ్ తిలసచి ఉప్పిరి, జేవ్ మాయలోకుమ్చ జలెకి, కేన్ లోకుమ్చ జలెకి, కిచ్చొ నావ్ తిలిసి నే పిట్టె ఎత్కిచి ఉప్పిరి, ఈంజ ఉగుమ్తె జర్గు జతిన్చి ఉప్పిరి కి, జెతి ఉగుమ్తె జర్గు జతిన్చి ఉప్పిరి కి, జోక అబ్బొసి ఎత్కిచి ఉప్పిరి వెల్లో కెర అస్సె. 22 జెర్మయలి ఎత్కి క్రిస్తుచి చట్టె అబ్బొసి తియ, నంపజలసక కిచ్చొ కామ్చి రిసా జలె కి, క్రిస్తు బోడి జతి రితి జో కెర అస్సె. 23 నంపజలస మొత్తుమ్క 'క్రిస్తుచి ఆగ్' మెనుక జయెదె. జోచి ఆగ్ పూర్తి జంక ఎత్కి పూర్తి కెర్తొసా జొయ్యి.

2

దేముడుచి దయకయ్ క్రిస్తు తెన్ ఏలుప కెర్తిసి

1 తుమ్ కెర్ల తప్పుల్ పాపల్చి రిసా తుమ్ మొర తతికయ్, తుమ్క జో, క్రిస్తు తెన్ జీవ్ కెర దిలన్. 2 అగ్గె పాపుమ్ ఇండితె తా, ఈంజ లోకుమ్చి బుద్దిచ, ఈంజ ఉగుమ్చ కమొతె తుమ్ గెతె తిలదు. పాడె జల ఆత్మల్ బూతల్ గట్ట ఎత్కిక ఏలుప కెర్తొ సయ్తాన్చి పట్టి గెతె తిలదు. దేముడుచి కోడు కెరుక నెనిత ఎత్కిజిన్చి పెట్టి జో సయ్తాన్చి ఆత్మ జోవయించి కామ్ కెర్తయ్.

3 దేముడుచి కోడు కెరుక నెనిత ఎత్కిజిన్చి రితి ఆమ్ కి అగ్గె మొర తా, పాపుమ్చ ఆసల్ జితె తా, అమ్చి ఆగ్చి ఆసల్, అమ్చ సొంత వేర వేర బుద్దుల్చ ఆసల్ రితి ఇండితె తిలమ్చి రిసా, లోకుమ్చ మాములుమ్ ఎత్కిజిన్ కిసి సొంత సెక్కిక దేముడు దెతి సిచ్చతె గెతి

† 1:21 1:21 జేవ్ పొదులె ఈంజేవ్ చెత్తర్ కొడె ఎత్కి. సగుమ్ సుట్టు దూతల్, బూతల్ ఆత్మల్ గట్టక సంగుల. ‡ 1:21 1:21 జేవ్ పొదులె ఈంజేవ్ చెత్తర్ కొడె ఎత్కి. సగుమ్ సుట్టు దూతల్, బూతల్ ఆత్మల్ గట్టక సంగుల. § 1:21 1:21 జేవ్ పొదులె ఈంజేవ్ చెత్తర్ కొడె ఎత్కి. సగుమ్ సుట్టు దూతల్, బూతల్ ఆత్మల్ గట్టక సంగుల. * 1:21 1:21 జేవ్ పొదులె ఈంజేవ్ చెత్తర్ కొడె ఎత్కి. సగుమ్ సుట్టు దూతల్, బూతల్ ఆత్మల్ గట్టక సంగుల.

జెర్మన్ తెన్ అస్తి గే, అమ్ కి దస్సి తిలమ్. 4 గని, దేముడు ఎదివాట్ కన్కారుమ్ దెకితోసాచి రిసా, జోచి ఎదివాట్ ప్రేమ అమ్చి ఉప్పిరి తియ, 5 అమ్ కెర్ల పాపల్చి రిసా, అమ్ ఆత్మక మొర్లన జలెకి, క్రీస్తు అన్నె జిలిన్ తెన్ అమ్క జియడ్లన్. పూర్తి జోచి దయచి రిసా తుమ్ *రచ్చించుప జలదు.

6 జలె, దేముడు అబ్బొసి క్రీస్తు యేసుక జియడ్లన్ తెన్ అమ్క జియడ, జోచి పరలోకుమ్చి రాజిమ్తె కిసి వెగడ ఒత్త వెనడ్లన్. అమ్ జోచయ్ జలి రిసా, అమ్క కి జా రాజిమ్తె వెగడ, అమ్క కి ఒత్త వెనడ్లి రితి కెర అస్సి. మెలె, అమ్ కి జో తెన్ జోచి †రాజిమ్తె ఏలుప కెర్లనుమ్. 7 జో దేముడు కిచ్చొక అమ్క దస్సి దయ కెర అస్సి మెలె, యేసుక్రీస్తు కెర్లన్ ఎత్తి తెన్ జో అమ్క ఎదివాటు దయ కెర్లసి. పడ్డొ జెత ఉగల్తె పలితుమ్ దెర, జోవయించి దయ కెర్లి మొచ్చుచి గే రుజ్జు దెకయెదె. జోచి దయ కెర్లి గే కో మీనుక నెత్తిర్తి.

8 ముక్కిమ్క కిచ్చొ అర్దుమ్ తుమ్ కెరన మెలె, తుమ్ సయ్తాన్చి రాజిమ్ తెంతో రచ్చించుప జలిసి తుమ్ కిచ్చొ కెర్లన్చి రిసాచి నెంజె; పూర్తి దేముడుచి దయచి రిసాచి కామ్ జా. పడ్డొ, జో దయ కెర్లసి తుమ్ నంపజా నజన్తికయ్, తుమ్క దొర్కు జలి. 9 కేన్ మాన్సు కెర్ల కిచ్చొ కమొచి సెక్తిక జో మాన్సు రచ్చించుప జంక నెత్త. నెంజిలె, జోవయించ సొంత కమొచి సెక్తిక రచ్చించుప జంక జతి జలె, మాన్సుల్ పులుక జతి. గని జోవయించి సొంత సెక్తిక కో నెత్తిర్తి, చి పులుక నెంజె. 10 అమ్ ఆత్మక జిలిసి జొయ్యి అమ్క నొవర్ జెర్మయ్లిసి. యేసుక్రీస్తుచి అత్తి దేముడు ఆత్మక అమ్క కిచ్చొక నొవర్ జెర్మయ్లో మెలె, అమ్క 'సత్తిమ్ ఇండుతు' మెన, జో అగ్గె తెంతో ఉచర్ల కమొ అమ్ నిదానుమ్ కెరుకయ్ మెనయ్ దస్సి కెర్లొ.

* 2:5 2:5 నెంజిలె, పాపుమ్ తెంతో, తుమ్చి పాపుమ్చి రిసాచి సిచ్చు తెంతో, అత్తమొర్ను తెంతో. † 2:6 2:6 ఆకర్క పరలోకుమ్తె జోవయింతెన్ ఏలుప కెరుమ్చె. పరలోకుమ్ జోవయించి అత్తరాజిమ్, చి జా రాజిమ్తె అమ్ బెదయ్ జలి రితి జా బెద అస్సుమ్, చి అప్పె తెంతో కి జోవయింతెన్ ఏలుప కెరుక దెర అస్సుమ్ మెనుక జయెదె. డీనయ్లిసి 5:10, 20:6 కి దెక.

యూదుల్ నెంజిలన అప్పె పాసి జా అస్తి

11 జాకయ్, తుమ్ పచ్చు నాయ్. కిచ్చొ మెలె, ఆఁగుక దెకిలె తుమ్ యూదుల్ నెంజిలన జస్తె. తుమ్ యూదుల్ నెంజిలనక యూదుల్ తిలన అగ్గె, 'దేముడు దిలి అమ్చి గుర్తుచి సున్నతి కెరంతి నాయ్, చి ఆత్మక సుద్ది జతి నాయ్' మెన, రితి ఆఁగి మాన్సులి కెర్తి జా గుర్తు కెర్పు నాయ్ చి రిసా తుమ్క నిస్కారుమ్ దెకిత్ తిల. 12 జలె, తుమ్ కిచ్చొ పచ్చు నాయ్. మెలె, జా పొది క్రీస్తుక దూరి తిలదు, పడ్డొ 'అమ్చి ఇస్రాయేల్చ వైజల్' మెలి దేముడుచి రాజిమ్తె తుమ్ బెదుక నెంజిలిసి, అన్నె, జో దేముడు ప్రమానుమ్ కెర్ల తెదొడవ నే పెట్ట సరిగచి కోడచ వరల్తె తుమ్క వాట తిలి నాయ్, చి జోచి రచ్చన తుమ్క నే దొర్కు జలి రిసా, ఈంజ లోకుమ్తె దేముడు నెంజిలన జా తిల. 13 గని అప్పె, యేసుక్రీస్తు ఈంజ లోకుమ్చ చి పాపుమ్ వయ జోచి లోయి సువ దా జా పాపుమ్ పుంచిలిన్చి రిసా, తుమ్ అగ్గె జోవయింక దూరి తిలనక దేముడుక జో యేసు పాసి కెర అస్సె.

యూదుల్క యూదుల్ నెంజిలనక కి ఎక్కి రాజిమ్తె బెదయ్లిసి

14 'ఆమ్ యూదులి' మెన, 'తుమ్ యూదుల్ నెంజిలన' మెన, అమ్ యూదుల్చి దేముడుచి గుడితె అమ్క తుమ్క అడ్డు కెర్తి ఆగ్గుల్ తయెదె. జలె, క్రీస్తుయి మొర అమ్ దొన్ని జట్టుచక మదెనె జా అమ్క దొర్కు జలి సేంతుమ్ జొయ్యి జా, అమ్క తుమ్క అడ్డు తిలి విరోదుమ్ జొయ్యి సేడవ అస్సె. జలె, జో దస్సి సేంతుమ్ కెరవ, ఆము తూమ్ ఎక్కి జట్టుచ జతి రితి కెర అస్సె. 15 కీసి మెలె, పూర్ణుమ్చ ఆగ్గుల్క ఆడ్రల్క నంప కెర్తి రితి పొన, అప్పె తెంతొ కామ్క నెంజిలి, అగ్గె దొన్ని జట్టు జల అమ్ మాన్సుల్క సేంతుమ్ కెరయ్లి రితి, 'అంచి తెడి ఎక్కి జట్టు జతు' మెన, ఈంజ లోకుమ్చ చి పాపుమ్ జొయ్యి జోచి అఁగి వయన, అర్పితుమ్ జలన్. 16 'జేవ్ దొన్ని జట్టు తెంతొచ మాన్సుల్ అంక నంపజా ఎక్కి ఆఁగ్ జతి రితి దేముడు అబ్బొ తెన్

‡ 2:14 2:14 యూదుల్చి దేముడుచి గుడితె నిజుమి దస్సి అడ్డు కెర్తి కోట తిలి.

అన్నె బెదయ్ జతు' మెన యేసు సిలువతె మొర్లి కామ్ తెన్ అమ్చి తుమ్చి అగ్గెచి విరోదుమ్ గెచ్చవ గెలన్. 17 అన్నె, తుమ్ దేముడుక దూరి తిలసక కి, దేముడుక పాసి రిత జల అమ్ యూదుల్క కి, జో సేంతుమ్ దెతిన్చి రిసా బోదన కెరుక కి అయ్లన్. 18 మెలె, యేసుచి అత్తి తుమ్క కి అమ్క కి జోచి అబ్బొన్చి ఎక్కి ఆత్మ దొర్కు జా అస్సెచి రిసా, తూమ్ కి ఆమ్ కి దేముడు అబ్బొన్ తెన్ బెద ఎక్కి జట్టు జంక వాట్ అయ్లి.

19 జలె, ఈంజ ఎత్కిచి రిసా తుమ్ అప్పె వేర మాన్సుల్ నెంజున్. తూమ్ కి దేముడుచి గేర్తె బెద, అమ్ నంపజలన్ తెన్ జోచయ్ మాన్సుల్ జా, తూమ్ కి దేముడుచి రాజిమ్చ జా అస్సన్. 20 జోచి గేర్క పునాది కిచ్చొ జయెదె మెలె, సుబుమ్ కబుర్ సంగిత జోచ బారికుల్, చి జోచి ఆత్మసెక్కిక జోచ కబుర్లు సంగితన. జా కెర ఎత్కిక బోడిపత్తుర్ కొన్సొ మెలె, యేసుక్రిస్తు. 21 జా గేరు మొత్తుమ్ జోచి సెక్కిక బెద, ప్రబు తెన్ టీవ, దేముడుచి నుద్ది తిలి గుడి జతి రితి వడ్డితయ్. 22 దేముడు జతి జా దేముడుచి నుద్ది తిలి ఆత్మ గుడి జతిన్తె తూమ్ కి క్రిస్తుచి తెడి తా వాటల్ జా బెద బందుక అస్సన్.

3

యూదుల్ నెంజిలసతె సుబుమ్ కబుర్ నూనవుక ప్రబు పవులుక తెద్రయ్లిసి

1 జలె, తుమ్ యూదుల్ నెంజిలసకయ్ సుబుమ్ కబుర్ ఆవ్ నూనవుక మెన యేసుక్రిస్తు అంక తెద్రయ్లో. తుమ్క నూనయ్లి రిసా, అంక, అమ్చ యూదుల్ *జేలి కెరన అస్తి. 2 తుమ్కయ్ 'సుబుమ్ కబుర్ నూన నంపజా అంచి ఆత్మగేర్తె జేవే కి బెదుత్' మెనయ్. దేముడు జోచి దయచి రిసా అంచి అత్తి జా సుబుమ్ కబుర్

* 3:1 3:1 రోమ్ పట్టుమ్తె జో జేలి జా తిలి పొది ఈంజ ఉత్తుమ్ పవులు రెగిడ్డొ, మెన ఒగ్గర్జిన్ ఉచర్తతి. బారికుల్ 28:16, 30, 31 దెక. కైనరియతె కి జేలి జా తిలో; బారికుల్ 23:25, పిలిప్పితెకి; బారికుల్ 16:23, చి యెరూసలేమ్తెకి; బారికుల్ 21:33 జేలి జా తిలో. ఎపెసుతె కి మెన నగూమ్జిన్ ఉచర్తతి, గని రుజ్జు నాయ్. పిలిప్పితె చి యెరూసలేమ్తె జేలి జలిసి తొక్కి దీనల్చి.

సూనయ్తి కామ్ సొర్పు కెర్లిన్చి రిసొ తుమ్ సూన అస్సున్. ³ వడ్డొ, జోచి జా గుట్టు జా తిలిసి ప్రబు సొంతయ్ అంక †దెకయ్లన్ మెన కి, సూన అస్సున్. ‡ఈంజ గుట్టుచి రిసొ ఇదిల్ కొట్టు సంగ ఈంజ ఉత్తమ్తె అగ్గె రెగ్డ అస్సి. ⁴ ఈంజ తుమ్ సదు కెర్లె, క్రీస్తుచి గుట్టు తిలిసిచి రిసొ ఆవ్ జాన్లిసి తుమ్ అర్దుమ్ కెరంతె.

⁵ జా గుట్టు, జలె, అగ్గెచ ఉగల్తె ఈంజ లోకుమ్చ మాన్సుల్క జాన్తి నాయ్. గని జోచి నుద్ది తిలి ఆత్ తెన్ దేముడుచి నుద్ది జల కబుర్లు సంగితసక, జోచి రిసొచ బారికుల్క, క్రీస్తు జా గుట్టు అప్పె జానవ అస్సె. ⁶ జా గుట్టు కిచ్చొ మెలె, క్రీస్తుక నంపజల యూదుల్ నెంజిలస కి అమ్చి తెన్ దేముడు దెతి రచ్చన వాట నజన్తి వాటు అయ్లిసి. నుబుమ్ కబుర్ సూనయ్లి తెంతొ, జేవ్ కి క్రీస్తుక నంపజా దేముడుచ వుత్తర్లు జా క్రీస్తుచి †ఆగ్ జతిన్తె బెద, క్రీస్తు జలో యేసుచి తెడి జేవ్ తిలి రిసొ, దేముడు ప్రమాసుమ్ కెర్లిసి ఎత్కితె జోవయింక కి వాట దొర్కు జా అస్సె.

⁷ అంచి పెట్టి కమొ కెర్లి జోచి ఆత్మసెక్కిచి రిసొ, దేముడు అంక దిలి జోచి దయక వరుమ్చి రిసొ ఆవ్ ఈంజయ్ నుబుమ్ కబుర్ సూనయ్తో సేవ కెర్తొసొ జలయ్. ⁸ జోచయ్ జల మాన్సుల్ మొత్తుమ్తె తొక్కి విలువచి కంట ఆవ్ అన్నె తొక్కి విలువచొ జలెకి, జోచి దయక జో అంకయ్ దిలన్. క్రీస్తుతె దొర్కు జతి పరలోకుమ్చ సొమ్మారుమ్ కెర్లి గే, కేన్ మాన్సు పూర్తి అర్దుమ్ జంక నెతిర్లె కి, తుమ్ యూదుల్ నెంజిలసక ఆవ్ బోదన కెరుక మెనయ్, జో అంక నిసొన్లన్. ⁹ అన్నె, తుమ్ యూదుల్ నెంజిలసక కి జో రచ్చన దొర్కు కెర్లిన్చి రిసొచి ఎత్కి జెర్మయ్లో దేముడు అగ్గెచ ఉగల్తె లుంకడ్లి గుట్టు ఈంజ లోకుమ్ ఎత్కిచ అర్దుమ్ కెరంతి రితి ఆవ్ సూనవుక నిసొన్లన్.

† 3:3 3:3 బారికుల్ 9:3-6, 15, గలతీయల్ 2:9 దెక. ‡ 3:3 3:3 1:9, 10 చి 2:11-22 దెక. § 3:6 3:6 రోమీయల్ 12:4, 5, కొరిందిల్ 1 నంబర్ ఉత్తమ్ 12 అద్యయిమ్, ముక్కిమ్క 12:12, చి ఎపెసు 1:23 దెక.

10 కేన్ లోకుమ్చ *ఆత్మల్ దూతల్ బూతల్, ఎత్కి కి, యేసుప్రబుక నంపజలస బెదిలిసి మొత్తుమ్క దెకిలె, దేముడుచి ఎదివాట్ సత్తిమ్ కెద్ది గే, కీసి నెరవెర్చుప జతయ్ గే, చినుతు మెనయ్, జొయ్యి అంక ఈంజ కామ్ దా అస్సె.

11 తుమ్ యూదుల్ నెంజిల నంపజలస కి జోచి ఆత్మగేర్తె బెదితిన్క 'జర్గు కెరిందె' మెన దేముడు అగ్గెయి తెంతో ఉచర్లిసి అమ్చొ ప్రబు జలో యేసుక్రీస్తుచి అత్తి †జర్గు కెర్లొ. 12 'ఈంజొ యేసుక్రీస్తు అమ్చి పాపుమ్ గెచ్చయ్తి అర్పితుమ్ జలి రిసా, అమ్ జోక నంపజలి రిసా, లాజ్ నెంజితె దేముడుతె గెచ్చుమ్దే' మెన అమ్క పూర్తి దయిరిమ్ అస్సె. 13 జాకయ్, తుమ్క ఆవ్ సుబుమ్ కబుర్ సూనయ్లి రిసా ఆవ్ అప్పె జేలి జా సైమల్ సేడ్డిన్చి రిసా తుమ్ బమ్మ జా అన్మానుమ్ జా నాయ్. తుమ్ యూదుల్ నెంజిలసకయ్ 'చెంగిల్ జతు' మెనయ్ ఇసి జలయ్. జాకయ్ తుమ్ సర్ద తెన్ తా.

పవులు ప్రార్థన కెర్లిసి

14 జలె, పరలోకుమ్తె కి బూలోకుమ్తె కి కేన్ కుటుంబుమ్చ జలెకి, దేముడు అబ్బొన్చి రిసాయి జేవ్ ఎత్కిక నావ్ అస్సె. 15 మొగ్రల్ టిక జోవయింక ఆవ్ కిచ్చొ మెన ప్రార్థన కెర్లిసి మెలె, 16 జోచి ‡ఎదివాట్ సత్తిమ్క, తుమ్చ ఆత్మల్తె జోచి ఆత్మ తా, తుమ్క పూర్తి డిట్టుమ్ కెర్చు మెన, 17 అన్నె, తుమ్చి నముకుమ్ తెన్ చి జోచి ఆత్మ తెన్ తుమ్చి పెట్టి క్రీస్తు జివున్ మెన, ఆవ్ ప్రార్థన కెర్లిసి. దస్సి, జోచి ప్రేమతె చెర్లొ గలిల్ రితి జస్తె, జోచి ప్రేమతె తుమ్ డిట్టుమ్ జస్తె, 18 చి ప్రబుచొ సుద్ది జలస ఎత్కిజిన్ తెన్ తుమ్క కిచ్చొ సెక్తి జెయెదె మెలె, జోచి ప్రేమ కెద్ది రూండు కెద్ది దీగు గే, తుమ్క అర్దుమ్ జెయెదె.

* 3:10 3:10 నెంజిలె, 'అదికారుమ్ తిలస, అదికారుల్ ఎత్కి కి'. ఇన్నె 'అదికారుమ్ తిలస', 'అదికారుల్' మెలె, ఆత్మల్ దూతల్ బూతల్చి అర్దుమ్ కెరసుక జయెదె. 1:21 దెక చి 1:21చి ఎట్టొచి కోడు దెక. † 3:11 3:11 మెలె, యేసు అమ్చి పాపుమ్ వయ గెచ్చవ జివ్ జా జోవయించి ఆత్మ దొర్కు కెర్లిన్ తెన్ని జర్గు కెర్లొ. ‡ 3:16 3:16 నెంజిలె 'ఎదివాట్ సామ్మారుమ్క'.

19 జలె కో జానుక నెతిరి క్రిస్తుచి ఎదివాబ్ ప్రేమ తుమ్ జాన్తె, చి దేముడు తుమ్చి పెట్టి బెర, తుమ్క పూర్తి కెరెదె. జయ్యి ఎత్తి అంచి ఆన.

20 అప్పె, జలె, అమ్చొ దేముడుక ఒగ్గర్ ఒగ్గర్ గవురుమ్ కలుగు జవున్! అమ్ నజిల్ కంట, అమ్ ఉచర్లి కంట, ఒగ్గర్ చెంగిల్ కెరుక తెరితొసా జో. కిసి మెలె, జోవయించి ఆత్మనెక్తి అమ్చి పెట్టి కామ్ కెర కెరయ్ అమ్క చెంగిల్ కెరెదె! 21 జాక, ఉగుమ్చి ఉప్పిరి ఉగుమ్క, కెయక తెయక నే పిట్టె, క్రిక్తిస్తు జలొ యేనుతె, చి జోచి ఆగ్ జల జోక నంపజలన మొత్తుమ్ ఇండితిన్తె దేముడుచి గవురుమ్ డీస్తె తవుసు! ఆమేన్.

4

తుమ్ ఎక్కి ప్రేమతె ఇండ

1 జలె, ఆవ్ పవులు, ప్రబుచి సుబుమ్ కబుర్ నూనయ్లి రిసా *జేలి జలొసా, తుమ్క కిచ్చొ బలవంతుమ్ జా సంగితసి మెలె, ప్రబు తుమ్క నిసాన తుమ్ జోచయ్ జా సత్తిమ్ ఇండితి రిసా తుమ్క బుకారా అస్సె. జో తుమ్క బుకార్లి వరుమ్క విలువ దెకితి ఎదిలి సత్తిమ్తె తుమ్ జీచ. 2 కిసి మెలె, తుమ్క తూమ్ గవురుమ్ నే ఉచరంతె మెత్తన తా, సేంతుమ్ తెన్ అల్లర్ ఒరుప్ప జా, ఎక్కిలోక ఎక్కిలో ప్రేమ తెన్ తుమ్ జోవయింక ఒరుప్ప జా, 3 ఎక్కి ఆత్మ, ప్రబుచి ఆత్మ తా, కట్టు తెన్ తతి ఆస తెన్ తా, దస్సి కట్టు తెన్ తతి రితి తుమ్ దెకన. ప్రబుచి సేంతుమ్ తుమ్చి పెట్టి తిలె, దస్సి ఎక్కి కట్టు తెన్ తస్తె. 4 కిచ్చొక మెలె, ప్రబుక నంపజల అమ్ ఎత్తిజిన్ జోచి ఎక్కి ఆగ్ జా అస్సుమ్, అమ్ ఎత్తిజిన్చి పెట్టి జోచి ఎక్కి ఆత్మ అస్సె, చి అమ్చి తెన్ పరలోకుమ్తె గెతి వరుమ్ తుమ్క దొర్కు జవున్ మెన దేముడు తుమ్క బుకార్లి రిసా అమ్ ఎత్తిక ఎక్కి ఆన. 5 పడ్డె, అమ్ నంపజలన ఎత్తిజిన్క అన్నె కిచ్చొ మెలె, అమ్క ఎక్కిలో ప్రబు, ఎక్కి నముకుమ్,

§ 3:21 3:21 1:1చి ఎట్టాచి కోడు దెక. * 4:1 4:1 3:1చి ఎట్టాచి కోడు దెక.

ఎక్కి బాప్తిసుమ్. 6 అమ్ ఎత్తిజిన్క ఎక్కిలో దేముడు, ఎక్కిలో అబ్బొ, ఎత్తిచి కంట వెల్లో జలోసా, జో. జో ఎత్తితెయి అస్సె, జోచ ప్రజల్ ఎత్తిజిన్చి పెట్టి జో జితయ్.

ప్రబుచి ఆత్మ జోచ మాన్సుల్చి పెట్టి తా

7 పడ్డొ క్రిస్తుచి దయచి రిసా జో అమ్ ఎత్తిజిన్ ఎక్కెక్లక జోచి ఆత్మసెక్తి వరుమ్ దా అస్సె. కెద్ది సెక్తి దెయెదె గే, కీసి సెక్తి దెయెదె గే, జోచి దయ. 8 జాకయ్, పూర్గుమ్ దేముడుచి కొడొతె రెగ్గయ్లి రితి, †“జోవయించ విరోదుమ్ సుదల్క జీన జేలి కెర్లి రితి జా, జో పరలోకుమ్తె గెచ్చు జోవయించ మాన్సుల్క ఆత్మవరల్ దిలన్” మెన అస్సె.

9 జోక ‘ఉత్త వెగ గెలన్’ మెలె, కిచ్చొ అర్దుమ్ మెలె, జో తొలితొ జోచి గవురుమ్ ముల పరలోకుమ్ తెంతో ఉత్త జా, బూలోకుమ్చి కంట ఎట్టొక మెలి రితి ఉట్ట జా అయ్లో. 10 ఉత్త జా అయ్లోసా అన్నె ఎత్తిచి కంట ఉప్పిర్ వెగిల్ రితి జా, పరలోకుమ్తె అన్నె వెగ గెలన్, జో తిలిన్క జోచి సెక్తిక ఎత్తిక పూర్తి కెర్తి రిసా.

11 జో దిల ఆత్మసెక్తి వరల్ కిచ్చొ కిచ్చొ మెలె, జోచ మాన్సుల్ సగుమ్జిన్ బారికుల్ జంక మెన జో నిసాన, పడ్డొ ‡జోచి ఆత్మసెక్తిక జోచ కబుర్లు నూన సంగితి రిసా అన్నె సగుమ్జిన్క నిసాన్లన్. పడ్డొ జోక నేన్ల మాన్సుల్క జోచి రిసా సికడ్డి రిసా, అన్నె సగుమ్జిన్క నిసాన్లన్. పడ్డొ, జోక నంపజలనక గొవుడు జా సికడ్డి రిసా అన్నె సగుమ్జిన్క నిసాన్లన్. 12 జేవ్ వేర వేర సెక్తివొ జోచయ్ జల మాన్సుల్క కిచ్చొక జో దా అస్సె మెలె, జోచి జేవ్ కెర్లి సేవక సెక్తి తంక, పడ్డొ, క్రిస్తుచి ఆగ్గ పూర్తి జతి రితి నంపజలన మొత్తుమ్ బెదితిసి పూర్తి జంక, చి 13 అమ్ ఎత్తిజిన్ ఎక్కి నముకుమ్ జా దేముడు పుత్తున్చి రిసా ఎక్కి రితి జాన, అమ్ పూర్తి ఆత్మపలితుమ్ దెర్ది రితి ఆత్మక పూర్తి

† 4:8 4:8 కిర్తనలు పుస్తకుమ్ 68:18. ‡ 4:11 4:11 జోవయించి ఆత్మ జోవయించి చోడి పుట్టయ్లె జోవయించ కబుర్లు నంగుల.

వడ్డీల్ రితి జా, క్రీస్తు కిసి సత్తిమ్క పూర్తి జా అస్సె గే, ఆమ్ కి దస్సి పూర్తి జంక. ¹⁴ ఆత్మక దస్సి వడ్డీలమ్ మెలె, బాలబోదల్చి రితి అమ్ పొరపాట్ జతె తంక నాయ్. కో నొవి కోడు సంగిలె నంప కెర, కో వేర కోడు సంగిలె నంప కెరుక జతె తా, మాన్సుల్ అవ్వె ఉచర్ల మోసిమ్ కొడొ సూన్తె తా, జోవయించ మాయకమొక నంపజా, వాదుక ఇత్తల్ ఒత్తల్ గెతె కెర్తల్ రితి జంక నాయ్. గని, ప్రబుచి తెడి ఆత్మక పూర్తి వడ్డీలమ్ మెలె, ఇత్తల్ ఒత్తల్ గెతె తము నాయ్, గని ఎక్కి నిదానుమ్ తెన్ తమ్దె.

¹⁵ అమ్ దస్సి ఇత్తల్ ఒత్తల్ నే గెతి రితి జంక మెలె, పూర్తి జంక మెలె, పూర్తి ప్రేమ తెన్ ఎక్కిలోక ఎక్కిలో ఎక్కి సత్తిమ్ సంగితె తంక, చి బోడి జలో క్రీస్తుచి ఆత్మతె బెద, ఎత్తితె బుద్ది జతి రితి ఆత్మక అమ్ వడ్డుక. ¹⁶ క్రీస్తు అమ్క బోడి జయెదె, చి జోచి ఆగ్చ వాటల్ కిచ్చొ జవుల మెలె, అమ్ జోచి ఆగ్చ వాటల్ మొత్తుమ్ జోచి తెడి తా జోచి నెక్తి తెన్ చెంగిల్ కట్టు తెన్ తా అమ్ ఎక్ఎక్ల వాట, అమ్క దిల కమొ నిదానుమ్ కెర్తె తిలె, ఈంజ ఆగ్ ప్రేమ తెన్ వడ్డ తా, పూర్తి డిట్టుమ్ జయెదె.

అగ్గెచ బుద్దివొ తుమ్ పూర్తి ముల

¹⁷ జలె, ప్రబుచి కీనావ్ తెన్ ఆవ్ తుమ్క కిచ్చొ ముక్కిమ్క బలవంతుమ్ కెర సంగితసి మెలె, దేముడుక నేన్ల యూదుల్ నెంజిలస కిసి జోవయించి మెన్సు చి వెర్రి ఉద్దెసుమ్లక ఇండితతి గే, తూమ్ దస్సి ఇండ నాయ్. ¹⁸ జేవ్చి ఆత్మతె గుడ్డి జా జోవయించి పెట్టి బుద్ది నెంజిలి రిసా దేముడుచి సుద్ది తిలి ఆత్మజీవ్ జతిన్క దూరి అస్తి, జోవయింక వేరయ్ మాన్సుల్ జా అస్తి. కిచ్చొక మెలె, జోవయించి సత్తిమ్ జేవ్ నెస, రాడ్ జీవ్చ జా అస్తి. ¹⁹ రాడ్ జీవ్చ జా, కన్యారుమ్ పచ్చ, ఎద్దరె ముద్దొ నే కెరంతె లంజె ఆసల్చ కమొతె పూర్తి గెచ్చ, గర్చ కమొ ఎత్తితె ఆస జా గెచ్చ అస్తి. ²⁰ తుమ్ క్రీస్తుచి తెడి సికిలిసి దస్సి నాయ్; ²¹ తుమ్ జోచి కోడు సూన్లదు మెలె, జోచి తెడి తా

జోతెయ్ సికిలదు మెలె. నాయ్, గెద, యేసుతె సత్తిమ్ అస్సె,. ²² జలె, జోచి కోడు సూన్లదు మెలె, జోతె సికిలదు మెలె, ఈంజ లోకుమ్చ మాన్సుల్చి బుద్ది తుమ్ అగ్గె ఇండితె తిలిసి పోన. ముర్కి పాలుమ్ తుమ్ కడ వెంట గెలి రితి జా, అగ్గెచి బుద్ది ముల. జా ఎత్తి బెర్తు ఆనల్చ మోసిమ్లు జా, పూర్తి నాసెనుమ్ కెర్తిసి. ²³ జా గర్చి ఎత్తి ముల, తుమ్చి పెట్టి తుమ్చి ఆత్మ తుమ్చి మెన్సుతె నొవర్ జా బుద్ది జా. ²⁴ దేముడు దెతి నొవర్ ఆత్మతె జెర్మున్ గలన జయ్యి రితి ఇండ. జో ఆత్మతె జెర్మున్ మెలె, దేముడుచి రితి జతి రితి జోచి సత్తిమ్క జోచి సుద్దిక తుమ్చి ఆత్మతె నొవర్ జెర్మున్ జలి రితి జతిసి.

కీస బుద్దివొ ముల, కీసి బుద్ది జంక

²⁵ తుమ్ సత్తిమ్ జంక మెన జో తుమ్క నొవర్ జెర్మయ్లో, తుమ్ అబద్దుమ్ ముల ఎత్తిజిన్ ఎక్కిలో తెన్ ఎక్కిలో సత్తిమ్ కొడొ జా. కిచ్చొక మెలె, అమ్ ఎత్తిజిన్ యేసుప్రబుచి ఎక్కి ఆగ్గెక వాటల్ జా అన్సుమ్. ²⁶ తుమ్ కోపుమ్ జంక జలె, పాపుమ్ జతి రితి నెరవెర్సువ కెర నాయ్. కోపుమ్ జలె, పొద్దు నే గెతె సేంతుమ్ జా, ²⁷ నెంజిలె తుమ్చి కోపుమ్ నెరవెర్సువ కెర తుమ్క పాపుమ్ కెరయ్తి రితి సయ్తానుక వాట్ దా తస్త, పోన. ²⁸ అగ్గె చొరై తిలన అప్పె తెంతో చొర్తు నాయ్, గని బాద సేడ్లనక తోడు నెంజిలనక తోడు దెతి రిసా, జోచ అత్తో సత్తిమ్ కమొ కెర కెర, మాములుమ్ కామ్ కెర కెర జియ కతు.

²⁹ తుమ్ లట్టబ్బిన్తె కిచ్చొ గర్చి బెదవ నాయ్, గని కిచ్చొ కామ్ తిలె, ఒత్త చెంగిల్క కామ్క జెతిసి కిచ్చొ జలె జయ్యి లట్టబ, చి తుమ్ లట్టబ్బిసి సూన్తనతె బుద్ది పలితుమ్ దెరెదె. ³⁰ పడ్డొ, 'సయ్తాన్చి రాజిమ్ తెంతో తుమ్క ఆప్ నెతోవ గెలిసి కచితుమ్ జెయిమ్ జయెదె' మెన జా రుజ్జుక దేముడు తుమ్చి పెట్టి జోచి సుద్ది తిలి ఆత్మ దా జోవయించి ముద్ద దా అస్సె. జాకయ్, జా ఆరి తిలి రితి దేముడుచి సుద్ది తిలి ఆత్మక దుకుమ్ కెర నాయ్. ³¹ పెట్టి విస్సుమ్ తతిసి, కోపుమ్ దెకయ్తిసి, కోపుమ్ దెరన్తిసి, గగ్గొల్, దూసెనల్, కుస్సిదుమ్ ఎత్తి తుమ్క దూరి కెర. ³² చి ఎక్కిలోక ఎక్కిలో మెత్తన తా, కన్కారుమ్

దెక, యేసుక్రీస్తుచి అత్తి దేముడు అబ్బొసి తుమ్క కీసి చెమించుప కెర అస్సె గే, తూమ్ కి దస్సి ఎక్కిలోక ఎక్కిలో చెమించుప కెర.

5

ప్రబుచి ప్రేమతె తుమ్ ఇండ

1 దేముడుచ ప్రేమ తిల బోదల్ తుమ్ అప్పె జలి రిసా, జో కీసి కెర్తయ్ గే దెక, తూమ్ కి దస్సి కెర, 2 చి క్రీస్తు కీసి అమ్క ప్రేమ తా దేముడు అబ్బొన్క దెతి దొర్కు జలి చెంగిల్ వాసెన తిలి అర్చితుమ్ జా, అమ్చి పాపుమ్ వుంచితి రిసా జోచి సొంత జివ్ దా మొర గెలన్ గే, తూమ్ కి దస్సి ప్రేమతె ఇండ.

3 లంజెకమొచి రిసాచ కొడొ జలెకు, లంజెబుద్దిచి రిసాచ కొడొ జలెకు, అన్నె మాన్సుల్చి అస్తిక ఆస జత కమొచి రిసాచ కొడొ జలెకు తుమ్ లట్టబా కి నాయ్. దసచచి రిసా ప్రబుచ సుద్ది జల మాన్సుల్ లట్టబుక కి బెదె నాయ్. 4 తుమ్ లట్టబ్బిన్తె వెట్యూరుమ్చ కొడొ పొన, కామ్క నెంజిత కొడొ పొన, వెర్రి కొడొ పొన; దసచ నూటి నాయ్. దసచ ఎత్తి పొన, గని దేముడు కెర్లి దయచి రిసా జోక తుమ్చి సర్ల సంగిత కొడొయ్ లట్టబ. 5 కేన్ కోడు ఏక్ తుమ్ కచితుమ్ దెరన మెలె, కేన్ లంజె ఇండితోసా, లంజెబుద్ది సికడొసా, అన్నె మాన్సుల్చి అస్తిచి ఆసక జితోసా కో జలెకు, జోవయించి ఆస జోవయింక దేముడు రితి జా, దేముడుక 'జో అమ్క నాయ్' మెలి రితి విరోదుమ్ కెర్లి రితి జతయ్, గెద; కో దస బుద్దివొచ జలె, క్రీస్తుచి దేముడు అబ్బొన్చి రాజిమ్తె జోవయింక కేన్ వాట కి దొర్కు జయె నాయ్.

ఉజిడ్బుద్దితె తుమ్ ఇండ

6 కామ్క నెంజిత కొడొ లట్టబ దస పాపుమ్ కమొచి రిసా కో తుమ్క మోసిమ్ కెర్లి రితి తుమ్ దెర్కు నేడ నాయ్. దస పాపల్చి రిసా జోచి కోడు నే నూన్త మాన్సుల్క దేముడు జోచి కోపుమ్చి సిచ్చ దెయెదె. 7 జాకయ్ దస కమొతె తుమ్ బెదె నాయ్. 8 కిచ్చొక మెలె, తుమ్

అగ్గె అందర్బుద్ధితె ఇండిలదు, గని అప్పె *ప్రబుచి తెడి ఉజిడ్ జా అస్సున్. ఉజిడ్చ బోదల్ రితి ఇండ. ⁹ కిచ్చొక మెలె, ఉజిడ్చి పలితుమ్ దెర్తిసి కిచ్చొతె చినుక జయెదె మెలె, చెంగిల్ తిలిసి ఎత్కితె, పొరపాట్ నెంతె తిలిస్ ఎత్కితె, సత్తిమ్ తిలిస్ ఎత్కితె. ¹⁰ పడ్డొ, కిచ్చొ ఎత్కిక చెంగిల్ మెన ప్రబు మెనెదె గే, తుమ్ అజ్జ కెరన.

¹¹ అందర్బుద్ధిచ కమొతె తుమ్ ఎద్దరె బెద నాయ్. దస్సు కమొ కిచ్చొ చెంగిల్ పలితుమ్ దెర్తి నాయ్. అన్నె మాన్సుల్ దస్సుచతె దెర్పు నే సేడ్డి రితి, ఉజిడ్చి పాసిక దస్సు కమొ ఆన, జోవయింక 'పాపుమ్చ' మెన రుజ్జుల్ దెకవ. ¹² జేవ్ మాన్సుల్ గుట్టు తెన్ కెర్తె కమొచి రిసా సంగుక కి లాజు. ¹³ గని, కిచ్చొ జలెకు అందర్ తిలిసి ఉజిడ్క పాసి అయ్లె, జాక 'జా పాపుమ్చి' మెన, రుజ్జు డిస్తయ్. కిచ్చొక మెలె, జా ఉజిడి ఒత్తయ్ దెకయ్ జా దెకయ్తయ్. ¹⁴ అమ్ ఒప్పన్తి కోడు ఏక ఇన్నె బెదితయ్. కేన్ కోడు మెలె,
 "ఓ నిజిలోసా, తెలివి జా ఉట్టు!
 మొర తిలోసా, జీవ్ జా ఉట్టు,
 చి క్రిస్తు తుక జోచి ఉజిడి దెకయెదె"
 మెలిసీ.

¹⁵ తుమ్ కిసి ఇండితె గే చెంగిల్ ఉచర, జాగర్త తెన్ తా. బుద్ధి నెంజిలసచి రితి తుమ్ ఇండ నాయ్, గని చెంగిల్ బుద్ధితె ఇండ. ¹⁶ కిచ్చొ కిచ్చొ చెంగిల కమొ కెరుక వాట్ అయ్లె, తెలివి తెన్, జా వాట్ అడ్డు నే కెర్తె రితి, నే పిట్టయ్తె, చెంగిల్ పలితుమ్ దెర్తి రితి జేవ్ కమొ తుమ్ కెర. కిచ్చొక మెలె, ఈంజ కాలుమ్ ఒగ్గర్ పాపుమ్చి, చి చెంగిల కమొక కెర్తి సమయమ్ తయెదె గే, నేనుమ్. ¹⁷ జాకయ్, బుద్ధి నేన్ల మాన్సుల్ రిత తుమ్ జా నాయ్, గని కిచ్చొ బుద్ధి తుమ్ ఇండుక ప్రబుచి ఇస్టుమ్ అస్సె గే, తుమ్ అర్దుమ్ కెరన.

¹⁸ తుమ్ సూరు పియ మచ్చు నాయ్. కిచ్చొక మెలె, జా చెంగిల్చిక పాడ్ కెర నాసెనుమ్ కెర్తిసి. గని దేముడుచి సుద్ది తిలి ఆత్తు తుమ్చి

* 5:8 5:8 నెంజిలె ప్రబుచి తెడి అస్సున్ చి జోవయించి ఉజిడి జా అస్సున్.

పెట్టి వేర జతయ్. 19 ఎక్కిలో తెన్ ఎక్కిలో ప్రబుచి గవురుమ్ సంగిత కిచ్చొ కిచ్చొ రగల్ గనుమ్లు గాయితె తా. జేవ్ గనుమ్లుతె కిచ్చొ ఏక్ రగుమ్ తుమ్ గాయ మెలె, కీర్తనలు. తుమ్చి పెట్టి పూర్తి సర్ల తెన్ ప్రబుచి గవురుమ్ సంగిత గనుమ్లు, బజెన తెన్ కి గాయితె తా, 20 కెయడ కి, కిచ్చొ జలె కి, కిచ్చొచి రిసా కి 'జొయ్యి దిలో' మెన, అమ్చొ ప్రబు జలో యేసుక్రీస్తుచి నావ్ తెన్ అబ్బొన్ జలో దేముడుక తుమ్చి సర్ల తుమ్ సంగితె తా.

తెర్నిమున్సు ప్రేమ దెకితిన్

21 క్రీస్తుక మరియాద దెకితి రితి, తుమ్ ఎక్కిలోక ఎక్కిలో పోటి నే కెర్తె, ఎక్కిలోతె ఎక్కిలో దాక్ కెరన, ఎక్కిలోక ఎక్కిలో సేవ కెర్తె తా. 22 తుమ్ తేర్బోదల్ తుమ్చ మున్సర్లుచి తెడి తా, దాక్ కెరన జోవయించి కోడు సూన, ప్రబుకయ్ గవురుమ్ కెర్లి రితి అంపొ జా తంక. 23 కిచ్చొక మెలె, క్రీస్తుక నంపజలన మొత్తుమ్ జోచి †ఆగ్ జతసుమ్. జా ఆగ్క జో క్రీస్తు బోడి. జా ఆగ్క జో సొంత రచ్చించుప కెర్తొసా జయెదె. దస్సి కి, తేర్నిక మున్సుసి బోడి జయెదె. 24 జోచి ఆగ్ జత నంపజలన మొత్తుమ్ క్రీస్తుచి తెడి అస్సుమ్, గెద. దస్సి, ఎత్రిచి రిసా తేర్ని మున్సున్చి తెడి అస్సె, జోవయించి కోడు సూనుక అస్సె.

25 తుమ్ మున్సుబోదల్ తుమ్చ తెర్నివొక ప్రేమ కెర్తె తా. కిచ్చొక మెలె, క్రీస్తుచి ఆగ్ జత నంపజలన సంగుమ్క 'చెంగిల్ జతు' మెన, బోడి జలో క్రీస్తు జోచి జివ్ దిలన్. 26 కిచ్చొక మెలె, ‡పాని సువ నుద్ది కెర్లి రితి, జా ఆగ్క జోచి కోడు తెన్ దోవితి రితి కెర, జా ఆగ్ జోచి జా గెతి రితి, పూర్తి సుద్ది కెర్లి రిసా దస్సి కెర్లన్. 27 కిచ్చొక మెలె, జోచి ఆగ్ జత అమ్, నంపజలన మొత్తుమ్ జోక పూర్తి సూటి తిలి తెర్ని జతి రితి, జొయ్యి గవురుమ్ తెన్ ఆనన్తి రిసా, జా పూర్తి సూటి జతిసి కిసి మెలె, కిచ్చొ ఆత్మ మచ్చల్ సర్లల్, దస్సుచ కిచ్చొయ్ నెంతె, జా పూర్తి ప్రబుచి, పూర్తి పొరపాట్ నెంజ, సుద్ది సూటి జతిసి.

† 5:23 5:23 1:23, 4:4 దెక. ‡ 5:26 5:26 నెంజెలె, 'బాప్తిసుమ్క చి జోవయించి కోడుక జేడ పూర్తి సుద్ది కెర జా జోచి జా గెతి రితి కెర్లి రిసా'.

28 జలె, జోచి ఆగ్ జల నంపజలన సంగుమ్క ప్రబు కిసి ప్రేమ కెర సుద్ది కెర్తయ్ గే, మున్నుసి కిసి జోవయించి ఆగ్క జోయ్యి కిసి ప్రేమ కెరెదె గే, జో దస్సి జోవయించి తేర్చిక ప్రేమ దెకుకయ్. కో తేర్చిక ప్రేమ కెర్తయ్ గే, జోకయ్ జోయ్యి ప్రేమ కెరన్లి రితి జతయ్. 29 కేన్ మాన్సుల్ కి జోచి సొంత ఆగుక కెయ విరోదుమ్ జతి నాయ్. నాయ్, గెద. పోసనుల, చెంగిల్ దెకనుల. దస్సి, క్రీస్తు జోచి ఆగ్ జత నంపజలన మొత్తుమ్ బెదిలిన్క పోస్తయ్, దెకితయ్. 30 అమ్ జోచి సొంత ఆగ్ జలి రిసా. 31 దేముడుచి కోడుతె రెగ్డయ్లిన్ కిసి అస్సె మెలె, కి“జాకయ్, మున్నుబోద, అయ్యన్అబ్బొన్క ముల, తెర్చి ఆన, జా తెన్ ఎక్కి నిదానుమ్ జయెదె, చి జేవ్ దొగుతెర ఎక్కి ఆగ్ జా గెచ్చుల” మెన రెగ్డ అస్సె.

32 క్రీస్తుక నంపజలన మొత్తుమ్ బెద జోచి ఆగ్ జతిన్క పెండ్లి జా చెంగిల్ దెకితి ఈంజ టాలిచి అర్దుమ్ వెల్లి. 33 గని మాములుమ్ తెర్చిమున్ను చి అర్దుమ్ కి ఉచరుక జయెదె. మెలె, తుమ్చి తెచ మున్నుబోదల్ కో జలెకి, తేర్చివొక ప్రేమ దెకుత్. పడ్డొ, తేర్చి మున్నున్క మరియాద దెకుక అస్సె.

6

బోదల్ అయ్యన్ అబ్బొన్

1 తుమ్ బాలబోదలు, *ప్రబుచి తెడి అయ్యన్అబ్బొన్చి కోడు నూన. ఈంజ ప్రబుచి ఇస్టుమ్. 2 పూర్గుమ్ దేముడు రెగ్డయ్లి జా కోడు కిచ్చొ మెలె, †“అయ్యన్అబ్బొన్క గవురుమ్ కెర. ప్రమానుమ్ తెన్ ఆగ్గుల్క ఈంజ తొలితొ చి.

§ 5:31 5:31 ఆదికాండుమ్ 2:24. * 6:1 6:1 మెలె ‘ప్రబుచి తెడి అస్సెన్చి జోవయించి ప్రేమబుద్ది తుమ్చి పెట్టి తిలె జోవయించి ప్రేమకయ్ అయ్యద్అబ్బొద్చి కోడు నూన్తె. † 6:2 6:2 ద్విత్వీయాపదేశ కాండుము 5:16.

3 మెలె, అయ్యద్ అబ్బోద్ క గవురుమ్ కెరై, తుమ్ క చెంగిల్ తయెదె, చి ఈంజ లోకుమ్ తె ఒగ్గర్ దీసల్ జిస్తె”
మెన రెగ్గ అస్సె.

4 తుమ్ అబ్బదింసి, జలె, ఆరి తుమ్ చ బోదల్ క కోపుమ్ కెరవ నాయ్, గని ప్రబు దెతి బుద్ది తెన్ జోవయింక ముద్దో కెర, ప్రబుచి ఎత్కి సికడ పొస.

సేవ కెర్తన ఎజొమాన్లు

5 కో గొతిమాన్సుల్ జలె, క్రీస్తుక గవురుమ్ కెర్తి రితి తుమ్ చ పెట్టితె ఎజొమాన్లుక బియఁ, ఎక్కి నిదానుమ్ తా, జోవయించి కోడు రితి కెర.

6 మాములుమ్ మాన్సులచి గవురుమ్ ఆనన్తి బుద్ది తిలి రితి, ఆరి డీసుకయ్ నిదానుమ్ తిలి రితి తుమ్ జా నాయ్. గని దేముడుచి ఇస్టుమ్ రితి కెర్తి రిసాయి తుమ్ క్రీస్తుచ సేవ కెర్తన తిలి రిసా, తుమ్ చి పెట్టిచి ప్రేమ తెన్ కెర. 7 మెలె, మాన్సుల్ క మెన్సు వడంతి రిసా నాయ్, గని ప్రబుక సర్ల తెన్ సేవ కెర్తి రితి, తుమ్ చ ఎజొమాన్లుచి సేవ తుమ్ సర్ల తెన్ కెర. 8 కేన్ మాన్సు, గొతిమాన్సు జలెకి నెంజిలె కి, కిచ్చొ చెంగిల్ చి కెర్లె కి, ప్రబు జోవయింక చెంగిల్ దెక బవుమానుమ్ దెయెదె మెన జాన్సు.

9 తుమ్ ఎజొమాన్లు, తుమ్ చ గొతిమాన్సుల్ క దస్సి ప్రేమ దెక, జోవయింక బియఁడ నాయ్. జోవయింక తుమ్ క ఎజొమాని జతో దేముడు పరలోకుమ్ తె అస్సె, చి జో కక్క మొకమాటుమ్ దెకె నాయ్.

సయతానుక జీన్తి రిసా ఆత్మ డిట్టుమ్ కెరనుక అస్సె

10 జలె, ఆకర్ కిచ్చొ మెన ఆవ్ రెగిడ్తసి మెలె, ప్రబుచి తెడి డిట్టుమ్ తా, జోచి ఆత్మసిక్తి దెరన ఇండ. 11 సయతానుక తుమ్ జీన్తి రితి, దేముడు దెతి కిచ్చొ నే లయితి ఇనుము సొక్క తుమ్ గలన. 12 కిచ్చొక మెలె, మాన్సుల్ క మాన్సుల్ కెర్తి యుద్దుమ్ నెంజె, ఈంజ, గని కో కో యుద్దుమ్ కెర్తనచి ఉప్పిరి అమ్ జీనుక అస్సె మెలె, కీవులువ

‡ 6:6 6:6 నెంజెలె ‘క్రీస్తుక గొతి మాన్సుల్ రిత తిలి రిసా’, నెంజెలె ‘క్రీస్తుక గొతి రితి జలి రిసా’. § 6:12 6:12 నెంజెలె, ‘అదికారుమ్ తిలిసి ఎత్కిచ ఉప్పిరి’.

కెర్త గర్చ ఆత్మల్చి ఉప్పిరి, *జోవయించి తెడి ఏలుప కెర్త ఆత్మల్చి ఉప్పిరి, ఈంజ ఉగుమ్చి అందర్ తిలి సయ్తాన్చి రాజిమ్తె ఏలుప కెర్త ఒగ్గర్ గార్చి సెక్తిచి ఉప్పిరి, మాన్సుల్క పాడ్ కెర్త బూతల్చి ఉప్పిరి, మాయలోకుమ్చ సెక్తివో ఎత్కిచి ఉప్పిరి అమ్ జీనుక అస్సె.

13 జాకయ్, కేన్ సమయుమ్క సయ్తాన్చ జేవ్ సెక్తివో అల్లర్ కెరుక ఉచరుల గే, దేముడు జా యుద్దుమ్క దిలి కిచ్చో నే లయితి 'ఇనుము సొక్క' మెన టాలిక సంగితిన్ ఎత్కి తుమ్ గలన తెయార్ జా తా, చి జా యుద్దుమ్క టీవ్క తుమ్క సెక్తి తయెదె, చి జీన టీవ్తె.

14 కిచ్చో నే లయితి జా కిచ్చో కిచ్చో తుమ్ గలన మెలె, సత్తిమ్ తుమ్క పట్క రితి జయెదె. ప్రబు దిలి పున్నిమ్ తుమ్క ఇనుము సొక్క జయెదె, 15 మాన్సుల్క దేముడు తెన్ బెదయ్తి సేంతుమ్ దెతిన్చి రిసాచి సుబుమ్ కబుర్ సూనయ్తి రిసా తెయార్ జితిసి తుమ్క డిట్టుమ్చ జోడ్లు జయెదె. 16 పడ్డో అన్నె, ప్రబుచి ఉప్పిరిచి నముకుమ్ తుమ్క డాలు జయెదె. జో గలనై, ఆగి లగిత సయ్తాన్ విందిత కండో నే లయితి రితి నెతోవ విజయ్తె. 17 పడ్డో, ప్రబు దెతి రచ్చన తుమ్చి బోడిక ఇనుము టోపి జయెదె. పడ్డో ఎత్కి అదికారుమ్ తిలో దేముడు రెగ్గయ్ల కొడో జోచి ఆత్మచి కండా దస్సి తుమ్ గలన.

18 అన్నె, దేముడుచి సుద్ది తిలి ఆత్మసెక్తి తుమ్చి పెట్టి తోడు తా, కెర్టోడ్ కి ప్రార్దన కెర, ప్రబుచి తోడు నజన్తె తా. ప్రార్దన కెరై తతి రిసా తెలిచి తెన్ తా, ఎక్కి నిదాసుమ్ తా, దేముడుచి సుద్ది సుదల్ ఎత్కిచి రిసా 'చెంగిల్ తత్తు' మెన తుమ్ ప్రార్దన కెర. 19 పడ్డో, †చి గుట్టు ఆవ్ దయిరిమ్ తెన్ సుబుమ్ కబుర్ సూనయ్తి రితి ప్రబు అంక సెక్తి దెవున్ మెన, అంచి రిసా కి తుమ్ ప్రార్దన కెరై తా. 20 జా సుబుమ్ కబుర్ సూనయ్లి రిసా ప్రబుచి అదికారుమ్ తెన్ తిలో బారికి రితో జా ఆవ్ ఇసి జేల్తె తా గొల్పుల్ తెన్ బందయ్ జా అస్సి. జలెకి, ప్రబుచి ఇస్టుమ్

* 6:12 6:12 నెంజిలె, 'అదికారుల్ ఎత్కిచి ఉప్పిరి'. † 6:19 6:19 చి రిసాయి 'చి గుట్టు' మెన సంగితయ్, నెంజిలె, యూదుల్ నెంజిలన కి పాపుమ్ తెంతో రచ్చించుప జతి, ఎత్కి అదికారుమ్ తిలో దేముడు తెన్ జేవ్ బెదితి వాటు అయ్లనచి రిసా సంగితయ్. 1:9-10, 3:1-6.

క్రీసి తిలె ఆవ్ దయిరిమ్ తెన్ ఈంజ నుబుమ్ కబుర్ నూనయ్తి రితి జో ప్రబు సెక్తి దెవున్ మెన, అంచి రిసా తుమ్ ప్రార్దన కెర.

21 జలె, ఆవ్ కీసి అస్సి గే కిచ్చొ కెర్దసి గే తుమ్ జాన్తి రిసా, ప్రేమ జలో అమ్క బావొ జతో, ప్రబుచి తెడి అంక తుమ్క సేవ నిదానుమ్ కెర్దొ తుకికు తుమ్క సంగెదె. 22 జాకయ్ జోక ఆవ్ తెద్రవ అస్సి. అమ్ కీసి సంతోసుమ్ గే తుమ్క జానవుక మెన, తుమ్చి పెట్టి తుమ్ దయిరిమ్ జతి రితి జో తుమ్క దయిరిమ్ సంగెదె.

ఆకర్ కోడు

23 దేముడు అబ్బొసి దెతి ప్రబు జలో యేసుక్రీస్తు దెతి సేంతుమ్, ప్రేమ, నముకుమ్ ప్రబుచి తెడి తిల ఒత్తచ బావుడ్లు ఎత్తిక కలుగు జవున్! 24 అమ్చొ ప్రబు జలో యేసుక్రీస్తుక కో పూర్తి నే మొర్తి ప్రేమ కెర్దసు గే, జోచి దయ తుమ్చి ఉప్పిరి తవును!

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 4 Mar 2023 from source files
dated 29 Jan 2022

7ccb2690-4432-5e86-88c1-f8ee976f30f4